



SIARAN MEDIA

KPWKM MULA GERAK KERJA PENUBUHAN PUSAT SUBFERTILITI PERTAMA NEGARA

PUTRAJAYA, 21 NOV. – Kementerian Pembangunan Wanita, Keluarga dan Masyarakat (KPWKM) akan memulakan gerak kerja penubuhan Pusat Subfertiliti Negara pertama yang bakal ditubuhkan dalam jangkamasa lima (5) tahun dari sekarang sebagaimana diluluskan Kerajaan dalam Rancangan Malaysia Kedua Belas (RMK-12), perkara ini diumumkan oleh Dato' Sri Hajah Nancy Shukri, Menteri Pembangunan Wanita, Keluarga dan Masyarakat dalam ucapan perasmian Persidangan Kependudukan Kebangsaan 2023 (PERKKS 23), hari ini.

“Pusat ini akan menyediakan khidmat rawatan kesuburan dan kesejahteraan keluarga yang komprehensif termasuk berfungsi sebagai pusat koodinasi penyelidikan, teknologi rawatan terkini dan latihan kepakaran di Malaysia,” tambahnya lagi.

Menurutnya lagi, “Pusat Subfertiliti Negara dilihat sebagai tepat pada masanya memandangkan sejak lima (5) dekad yang lalu, kadar kesuburan penduduk negara telah menurun dengan mendadak iaitu daripada 6.7 orang anak bagi seorang wanita pada tahun 1957 kepada 4.0 orang anak pada tahun 1980, 3.0 orang anak pada tahun 2000, 2.1 orang anak pada tahun 2010 dan terkini hanya 1.6 orang anak pada tahun 2022, kadar terendah yang pernah dicatatkan oleh negara.”

PERKKS 23 yang bertemakan “**Penduduk dan Keluarga Mampan, Membangun Malaysia MADANI**” turut menyediakan satu sesi khas perbincangan meja bulat bagi menghasilkan resolusi yang mengandungi cadangan dasar dan langkah intervensi untuk menangani isu penurunan kadar kesuburan penduduk negara, dan semua cadangan yang terkandung dalam resolusi adalah pelengkap kepada inisiatif intervensi yang sedang dirancang dan digerakkan oleh KPWKM melalui LPPKN.

Sebagai makluman, penganjuran PERKKS 23 pada hari ini dan esok, masih meneruskan kerjasama strategik bersama-sama *United Nations Population Fund* (UNFPA) Malaysia dan Fakulti Perniagaan dan Ekonomi, Universiti Malaya (UM), selain penglibatan MERCK Malaysia sebagai rakan kerjasama yang baharu.

Turut hadir, YBhg. Datuk Dr. Maziah binti Che Yussof, Ketua Setiausaha KPWKM, YBhg. Dato’ Sri Rohani Karim, Pengerusi LPPKN, YBrs. Tuan Haji Abdul Shukur Abdullah, Ketua Pengarah LPPKN, YBrs. Dr. Asa Torkelsson, Perwakilan Tetap UNFPA Malaysia dan YBrs. Puan Pixie Yee, Pengarah Urusan MERCK Malaysia dan pegawai-pegawai kanan Kementerian.

Untuk sebarang pertanyaan, sila hubungi:

Sekretariat PERKKS 23

Bahagian Penyelidikan Kependudukan dan Keluarga
Lembaga Penduduk Dan Pembangunan Keluarga Negara (LPPKN)
Kementerian Pembangunan Wanita, Keluarga dan Masyarakat
No.Tel: 03-2613 7775 (samb.1600)
Emel: kependudukan@lppkn.gov.my

###

**UNIT KOMUNIKASI KORPORAT
KEMENTERIAN PEMBANGUNAN WANITA, KELUARGA DAN MASYARAKAT
21 NOVEMBER 2023**